

# Da Schluein fin Schnaus

Ils abitadis situads al nord da la citad da Glion

■ Il LIR preschenta oz ils abitadis situads sin la spunda sanestra da la Foppa, al nord da la citad da Glion. Dal nordost al nordvest èn quai ils vitgs da Schluein, Ladir, Ruschein e Schnaus. Dapi il 2014 fan las anteriuras vischnancas politicas da Ladir, Ruschein e Schnaus part da la vischnanca dad Ilanz/Glion.

## Schluein

Vischnanca politica, circul Glion, district Surselva (avant il 2001 Glogn), situada sin la spunda sanestra da la Foppa. Consistenta da Casanova sco era da Schluein e Falerin, duas culegnas da different caracter. 831 *Falerunae*, 1298 *Shluen*, tudestg *Schleuis* (uffizial fin il 1983). 1850 366 abitants; 1900 424; 1930 593; 1950 554; 2000 602. En il territori da la vischnanca sa chattan craps cultics pajauns (megalits), numnads Crap Schluein e Crap da pops. Schluein era oriundamain in feud episcopal. Dal temp medieval aut fin il 1803 era la vischnanca suttamessa (senza Falerin) al domini dals signurs von Löwenberg. La baselgia consecrada als sontgs Pieder e Paul, menziunada per l'emprima giada il 1321, era ina filiala da Sagogn. Il 1429 è Schluein entrà sco cumin en la Lia Grischa ed ha alura furmà, ensemen cun las dretgiras da la Foppa e da Tenna, la dretgira auta da la Foppa. Il 1530 ha la vischnanca cumprà ora las dieschmas ed ils dretgs feudals seculars, il 1585 ils dretgs giudizials. Tranter il 15avel ed il 17avel tschientaner sa spartiva la via en la Lumnezia respectivamain en la Val S. Pieder ed en la Val Stussavgia a Schluein e traversava il Rain al sidost per Saissafatga u Sassfau (en vischnanza da Castrisch). La vischnanca da Schluein profita da la situaziun favuravla dal traffic e dispona d'ina buna structura demografica ed economica. Il 2005 purscheva il prim sectur anc passa 15%, il terz sectur ca. 54% da las plazzas da lavur en la vischnanca. Part da la populaziun da lingua rumantscha: 1941 84,6% (lingua materna); 2000 53,2% / 66,1% (meglra lingua / tuttas indicaziuns).

Adolf Collenberg

## Löwenberg

Il signuradi da Löwenberg, schlià il 1803, ha fatg part sco cumin da Schluein da la dretgira auta da la Foppa. El è sortì dal feud episcopal da Schluein senza il bain (*curtis*) da Fallerins ed aveva sia sedia en il chastè dal medem num, situà sin in sparun. La fortezza è menziunada per l'emprima giada il 1160 sco residenza dals nobels de *Lewenberch* ch'appartegnevan a la medema schlatta sco ils de Montalt, documentads il 1258

sco proprietaris dal chastè; forsa sa tracti perfin da la medema famiglia. Il 1378 è il chastè passà als Rüsseggs ed ha appartegnì dal 1383–1428 als Werdenberg-Sargans. Il 1395 han quels aderi a la Lia dals signurs a Glion (la Lia Sura respectivamain Lia Grischa) – ensemen cun la gliud dal signuradi da Löwenberg ch'han acquistà lur autonomia il 1428. Il 1429 è il chastè vegnì vendì als Lumerins, tranter il 1481 ed il 1489 als de Mont (Vella) per midar pliras giadas possessur tranter il 1551 ed il 1594 (tranter auter ils Capols ed ils Plantas); fin il 1803 ha il chastè appartegnì al rom dals de Mont-Löwenberg. Destruì d'in incendi il 1685, è el vegnì reconstruì parzialmain. Sedia d'ina scola per mats 1832–33 e dals missiunaris dal Sang prezios 1838–50. In ulteriur incendi ha mess l'implant en ruina il 1889; l'asil episcopal per orfens, existent là dapi il 1851 (serrà il 1972), è perquai vegnì transferì ca. 150 m pli al sidvest en in nov edifiz ch'è en possess da la diocesa da Cuir.

Adolf Collenberg

## Ladir

Anteriura vischnanca politica, circul Glion, district Surselva (avant il 2001 Glogn), situada sin la spunda nord da la Foppa, cun l'exclava Alp Dadens da Ladir al Crap Masegn; dapi il 2014 part da la vischnanca da Ilanz/Glion. Vers il 850 *Leitura*. 1850 98 abitants; 1900 94; 1950 139; 2000 107. Tschentada da craps preistorics cun il Crap da tirans legendar. En il temp medieval appartegneva ina part dals purs da Ladir als uschenumnads Libers exteriurs da Lags, per ils quals els han mess en il 15avel tschientaner divers mastrals. Ladir furmava da quel temp in vischinadi cun Schnaus e Ruschein. Il 1502 han ins dividì las pastgiras d'alp ed il 1851 èn las vischnancas da Ladir, Schnaus e Ruschein daventadas politicamain autonomas. La baselgia da S. Zeno, menziunada enturn il 840 sco proprietad da la claustra da Faveras, è stada ina filiala da Ruschein fin il 1684. Enturn il 1556 han intginas familias aderi a la reformaziun ed han stuì bandunar la vischnanca. Il gaud sur Ladir e la culegna sezza èn vegnids devastads dad incendis il 1848 respectivamain il 1891. La vischnanca tradizionalmain purila è sa sviluppada fermamain suenter il 1970 sut l'influenza da la regiun turistica da Lags-Falera: en il rom da la planisaziun locala dal 1976 èn vegnidas construidas abitaziuns da vacanzas e dal 1974–97 ha Ladir exequì la meglieraziun generala cun arrundaziun dal terren. Da la mesadad dal 19avel tschientaner fin il 1980 disponiva la vischnanca d'ina atgna scola primara, da-



Dapi il 2014 fa l'antieriura vischnanca da Ladir part da la vischnanca da Ilanz/Glion.

FOTO J. MENOLFI

pi alura van ils uffants a scola a Ruschein (scola reala e secundara a Glion). Ils manaschis purils caracteriseschan anc oz il vitg rumantsch. Part da la populaziun da lingua rumantscha 2000: 57% / 75,7% (meglra lingua / tuttas indicaziuns). Trais tschintgavels da la populaziun cun activad da gudogn a Ladir lavuran ordaifer en il segund e terz sectur (oravant tut a Glion e Domat).

Adolf Collenberg

## Ruschein

Anteriura vischnanca politica, circul Glion, district Surselva (fin il 2001 Glogn), situada sin ina terrassa da la vart nord dal Rain Anteriur, cun l'Alp da Ruschein entadim la Val da Siat; dapi il 2014 part da la vischnanca da Ilanz/Glion. 765 *Rucene* (copia dal 17avel tschientaner), ca. 1160 *Rusine*. 1850 245 abitants; 1900 277; 1950 309; 1980 283; 2000 356. Lieu da cult preistoric en la regiun dal chastè da Frunsberg (ruina) – S. Valentin – Crap Fravi (megalits, craps-scalutta, chats dal temp da bronz). En il temp carolingic existiva a Ruschein in bain central cun chasa signurila. La baselgia, che datescha probablamain dal 7avel tschientaner (patrocini da s. Gieri menziunà il 1440), era enturn l'onn 840 tributara a la claustra da Faveras, da la quala la collatura è passada il 1489 a la claustra da Mustér. Fin il 1526 è stà S. Gieri la baselgia-mamma per Siat, fin il 1684 per Ladir. Durant la reformaziun è la vischnanca da Ruschein restada fidaivla a la cardientscha cato-

lica; 11 familias reformadas da Ruschein e da Ladir han stuì emigrar il 1556. Il chastè da Frauenberg è stà la sedia dals baruns dal medem num en il 13avel e 14avel tschientaner. En il rom d'ina structura colonisatorica ed economica decentralisada han ils da Ruschein pratitgà l'agricultura, l'orticultura e l'allevament da muvel. En il 15avel–18avel tschientaner ha Ruschein constituì in vischinadi cun Ladir e Schnaus, l'entschatta dal 21avel tschientaner han las trais vischnancas furmà ina corporaziun d'alp. Meglieraziun generala 1963–94. Il 2005 eran occupadas 45% da las persunas cun activad da gudogn a Ruschein en il sectur primar (allevament da muvel, pauca cultivaziun dad ers); numerus pendularis dal lieu, oravant tut en ils centers da la Val dal Rain Anteriur. Turissem moderà a l'ur da l'Arena Alva. Part da la populaziun da lingua rumantscha: 1880 96,4% (lingua materna); 1990 81% / 87,7%; 2000 69,4% / 83,7% (meglra lingua / tuttas indicaziuns).

Adolf Collenberg

## Frauenberg

Ruina da chastè situada en il territori da l'antieriura vischnanca da Ruschein sin in crest al sidvest da la baselgia da S. Gieri. Il chastè da Frauenberg è vegnì erigì enturn il 1300, la miraglia è construìda en la tecnica da spia (*opus spicatum*). Menziunà per l'emprima giada il 1257 sco *Vrovinberch*, *Vrowenberch*, en possess dals signurs (*nobiles*) de Frauenberg, ministerials da l'uvestg da Cuir. Frauenberg n'è betg identic cun Frundsberg.

Adolf Collenberg

## Von Frauenberg

Schlatta da l'auta noblezza da la Rezia Sura, residenta en il 13avel ed a l'entschatta dal 14avel tschientaner en la fortezza dal medem num sper Ruschein. Sco ils de Friberg eran era ils de Frauenberg probablamain in rom dals signurs de Sagogn ch'era sa furmà enturn il 1250 en consequenza d'ina partiziun d'ierta. L'emprim represchentant enconuscent da la famiglia è Heinrich (menziunà il 1257–66) che correspunda probablamain a Heinrich de Sagogn, attestà il 1251 ensemen cun ses frar Friedrich de Friberg. En ils onns sequents cumparan omadus pliras giadas ensemen sco perditgas. La famiglia possedeve era il chastè da Favugn ed ils dretgs ecclesiastics respectiv, ultra da quai bains e dretgs a Luzein, Castrisch e Falera. Heinrich, il trubadur, ha persequit senza grond success ina politica proepiscopala ed antihabsburgaisa. La posiziun occupada da Heinrich ha probablamain inti-

mà la famiglia da transferir sia residenza da la Surselva sin la fortezza da Gutenberg sper Balzers/FL. Suenter la mort da Heinrich il 1314 han ses anteriurs adversaris (l'Austria ed ils Werdenbergs) partì tranter els ils bains da famiglia ch'els avevan acquistà da sias figlias Katharina e Margaretha; la fortezza da Gutenberg è passada a l'Austria, Favugn ed ils possess en Surselva als Werdenberg-Heiligenbergs.

Martin Leonhard

## Schnaus

Anteriura vischnanca politica, circul Glion, district Surselva (avant il 2001 Glogn), situada a la via da la Surselva sur il Rain Anteriur, cun l'alp da Schnaus sco exclava a l'ost sur la Val da Siat; dapi il 2014 part da la vischnanca da Ilanz/Glion. Ca. 840 *Scanaves*. 1850 126 abitants; 1900 123; 1950 134; 1990 79; 2000 99. Schnaus appartegna al vegl territori da colonisaziun. Il 1470 è la vischnanca sa separada dal vischinadi economic cun Ruschein e Ladir; l'ultim temp ha ella dentant puspè furmà ina corporaziun d'alp cun quellas vischnancas. La baselgia deditgada als sontgs Bistgaun, Maria Magdalena e Gieri, attestada il 1480, era ina filiala da S. Rumetg a Falera. Enturn il 1526 ha Schnaus adoptà la cretta reformada, sa separand da Falera e s'unind cun Glion. Dal 1692 fin il 1865 ha ella furmà in'atgna plaiv ed è alura s'unida cun Vuorz. En il 16avel–19avel tschientaner aveva Schnaus plirs manaschis industrials e comercials a l'aul da Siat (resgia, mulin, fravgia da ferrea), conservads oz per part en il Museum regional Surselva a Glion. Tranter il 1875 ed il 1964 ha producì il manaschi da la famiglia Giger il famus crie da Schnaus, in arader fitg dumanà. Il 2005 furniva il prim sectur 50% da las plazzas da lavur. Grazia als tschains d'aua da las Ovras electricas Glion I e II ha la vischnanca pudì meglierar sia situaziun finanziaria. Part da la populaziun da lingua rumantscha: 1941 68,3% (lingua materna); 2000 45,5% / 65,7% (meglra lingua / tuttas indicaziuns).

Martin Bundi



Löwenberg: L'edifiz odiern è vegnì erigì suenter ch'il chastè era i en ruina il 1889.

FOTO O. ITEM

## Lexicon Istoric Retic

Il LIR cumpiglia bundant 3100 arttgels (geografics, tematics, artitgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: [www.e-lir.ch](http://www.e-lir.ch); versiun stampada: [www.casanova.ch](http://www.casanova.ch) u en mintga libreria.